



Convocatoria per Ribeseya/Ribadesella: Sumar esfuerzos

Coles mires de construyir una alternativa política global en toa Asturias que sume esfuerzos en tolos compromisos electorales que tán por venir, entamando polos municipales de esti mayu y llegando a los estatales d'a lo cabero l'añu, Izquierda Xunida y la Agrupación de electores 'Pueblu' de Ribeseya/Ribadesella algamen un principiu d'alcuertu políticu colos oxetivos que vienen darréu:

- Va presentase una candidatura conxunta en Ribeseya/Ribadesella denominada “Convocatoria per Ribeseya/Ribadesella”, integrada por Pueblu, Izquierda Xunida y cuantes persones quieran sumase a esti proyectu conxuntu que tien vocación de gobernar Ribeseya/Ribadesella dende planteamientos progresistes y de cambéu.
- Esta candidatura súmase a “Convocatoria per Asturias”, un alcuertu progresista en construcción qu'inclúi a Más País–Más Asturias, Izquierda Asturiana, Izquierda Xunida y a independientes, y que tien la voluntá d'incorporase al futuru gobiernu d' Asturias.
- La política de Convocatoria per Ribeseya/Ribadesella va tar directamente conectada a la hestoria de Pueblu nel conceyu, que siempre representó una opción política de cambéu y meyora progresista na política municipal. Queremos recordar que IX y Pueblu vinieron collaborando dende la ñacencia d'esta última. El programa municipal de Pueblu, por tantu, va conformar la propuesta básica de Convocatoria por Ribeseya/Ribadesella.
- Convocatoria per Ribeseya/Ribadesella va ser, por tantu, una candidatura con clara vocación municipalista, que gueta la xunidá popular y namás respuede énte la ciudadanía de Ribeseya/Ribadesella. Va tener, poro, independencia dafechu con respectu de tolos axentes políticos que nun seyan de Ribeseya/Ribadesella anque va llegar a alcuerdos xenerales, siempre refrendaos por Pueblu y IX conxuntamente, pa, como espresa el títulu de la presente declaración, sumar esfuerzos progresistes nel ámbetu autonómicu y estatal.
- Convocatoria per Ribeseya/Ribadesella, lo mesmo que Convocatoria per Asturias, ñaz tamién pa reforzar a los sos integrantes. Pueblu ye una espresión democrática municipal con una gran potencialidá, que tien que xorrecer entá muncho más y eso depende de la so independencia y directa conexón con la ciudadanía; poro, IX y Pueblu alcuerden collaborar dende la independencia política dafechu y la capacidá de diálogu y namás per aciu del alcuertu permanente. Convocatoria nun ye una nueva organización, ye un instrumentu de cambéu.
- IX y Pueblu súmanse pa gobernar Ribeseya/Ribadesella, pa xenerar esperanza de cambéu nun conceyu con un enorme potencial social y económicu. Les nuses vecines y vecinos merecen una alternativa sólida como ye esta Convocatoria per Ribeseya/Ribadesella.